



Dette er klatreveggen på Seim. (Foto: Ola Matti Mathisen)

**Styret i Kvinnherad turlag har no godkjend flytting av turlaget sin klatrevegg i gymnastikksalen på Seglem skule til Aktivitetshuset i Uskedalen. Veggan og den vidare drift blir overteke av Uskedal idrettslag. No står veggan ubrukt på Seim og ingenting tyder på at dette vil endra seg dei næraste åra.**



...som skal til Uskedalen og monterast på denne veggen. (Foto: Ola Matti Mathisen)

Veggen skal plasserast på veggen mot garderobane, opplyser styreleiar i Aktivitetshuset Bjørn Olav Tveit til uskedalen.no.

Det heiter i avtalen mellom partane at veggen skal demonterast på dugnad i løpet av vinteren og våren og at turlaget og idrettslaget står ansvarleg for nødvendige utbetringar og reparasjonar i hallen på Seglem skule. Tveit strekar under at det bli nødvendig med ein betydeleg dugnadsinnsats i samband med dette prosjektet og han oppmodar interesserte om å melda seg til teneste.

Korkje i turlaget si fjellsportgruppe eller i andre organisasjonar i området rundt Seim er det i dag interesse for å ta ansvar for drifta av veggen. Fjellsportgruppa har hatt forgjeves kontakt med ulike aktørar. Gymastikksalen på Seim ligg ikkje i tilknytning til ein skule og det er fem kilometer til nærmaste skule i Rosendal. Difor er det ikkje aktuelt å tenkje at skulane der vil ha nytte av veggen. Fjellsportgruppa ynskjer ikkje å drive veggen vidare.

Tveit strekar i søknaden til kommunen om flytting under at ein i Uskedalen har hatt ynskje om å byggje ein klatrevegg sidan starten av prosjektet Aktivitetshuset. Men det har så langt ikkje vorte prioritert økonomisk i planane, No har hallen vore i bruk ei tid og interessa er stor for å utvide aktivitetstilbodet med ein klatrevegg.

Tveit minner om at Aktivitetshuset ligg vegg i vegg med skulen med undt 100 elevar og et er von om at skulen vil integrera veggen i sine aktivitetar. Uskedalen ligg rundt 10 kilometer frå Seim og ved å flytte veggen vil ein kunne femne mange av dei same brukarane som tidlegare nytta han.

Det blir i søknaden til kommunen også vist til at delar av fjellsportmiljøet som i 1999 stifta Fjellsportgruppa og som deretter bygde og stod ansvarleg for drifta av veggen i dag er busett i Uskedalen. Aktiv drift av eit slikt anlegg er avhengig av eldsjelar og desse er i dag å finna i Uskedalen Til alt overmål har dei eigne ungar som klør i fingrane etter å kome seg opp i veggen, skriv Tveit.

Han strekar under at det i eit lengre perspektiv vil svara seg å flytta veggen til Uskedalen: Bygda er godt kjend i klatremiljøet. Årleg arrangerer Fjellsportgruppa i Bergen turlag turar til dalen for å klatre i fjellmassivet Ulvanåso som ligg i bygda. Turlaget har også planar om å etablere ei hytte i dalen ved foten av Ulvanåso. Dette prosjektet vil vidareutvikle miljøet kring fjellsport generelt og klatring spesielt i Uskedalen. Klatreveggen i Aktivitetshuset vil inngå som eit ledd i denne utviklinga, konkluderar Tveit.

Av Ola Matti Mathisen